

Xiletelo xa Mudyondzisi Bibele ya mina yo sungula

Pholisi

Nhluvukiso wa ririmi wu humelela loko hi kongomisa ngopfu eka ku simeka na matirhiselo lamanene ya tipholisi ta ririmi. Ku tinyiketela ni ku hiteka etlhelweni ra vadyondzi i swa nkoka loko va fanele ku dyondza mavulavulelo ya ririmi hindlela leyi faneleke. Vatswari na vadyondzisi va khutaziwa ku kombeta ntsakelo eka leswi vadyondzi va swi vulavulaka kumbe ku swi tsala hikuva leswi swi ta va susumetela ku lava ku tiva ririmi. Mudyondzisi u fanele ku vekela vadyondzi erivaleni mimbuyelo ya dyondzo yin'wana na yin'wana.

Tidyondzo leti nga ebukwini ya mudyondzi ti longoloxiwile ku ya hi malembe ya vadyondzi. Marito na ririmi na swona swi olovisiwile ku endlela leswaku swi angarhela vuswikoti bya mavonelo ya vona. Mudyondzisi u khutaziwa ku hlaya xitori hinkwaxo ebibeleni ku endlela leswaku va ta kota ku twisisa hi ku hetiseka vundzeni bya xitori.

Hi leyi mimbuyelo ya tidyondzo leyi faneleke ku va yi fikeleriwile endzhaku ka tidyondzo leti:

- Vadyondzi va fanele ku kota ku vula switwari na switatisi.
- Vadyondzi va fanele ku kota ku tirhisa swihikahato no antswisa mianakanyo ya vona mayelana na leswi va swi hlayaka.
- Vadyondzi va fanele ku kota ku tirhisa tithoni to hambanahambana eku hlayeni ka vona.
- Vadyondzi va fanele ku kota ku tirhisa mianakanyo ya vona na maehleketelelo yo xopaxopa.
- Vadyondzi va fanele ku kota ku hlamusela xitori lexi va xi hlayeke.
- Vadyondzi va fanele ku kota ku yingisela hindlela yo xopaxopa.
- Vadyondzi va fanele ku kota ku hlaya hi vukheta na hindlela yo xopaxopa.
- Vadyondzi va fanele ku kota ku hlaya hi khaqato kumbe hi ku hetiseka.
- Vadyondzi va fanele ku kota ku antswisa no engetela ntivomarito wa vona.
- Vadyondzi va fanele ku kota ku pananisa xifaniso na nhlamuselo yo yelana na xona.
- Vadyondzi va fanele ku kota ku vona swilo leswi fananaka na leswi hambanaka.
- Vadyondzi va fanele ku kota ku rungula no hundzisa mahungu.

Landzela swiletelo!

Swifaniso leswi nga laha hansi swi pfuna vadyondzi na vadyondzisi ku landzela swiletelo swa dyondzo yin'wana na yin'wana.



Mudyondzisi u hlamusela ayikhoni kutani a ya emahlweni no nyika nhlamuselo ya leswi faneleke ku endliwa.



Ayikhoni leyi yi kombeta ntirho wa mudyondzi.



Vadyondzi va tsala.



Vadyondzi va languta marito.



Vadyondzi va tirhisa tikhirayoni ta vona ku khalara.



Vadyondzi va hlayela marito ehenhla no hlamula swivutiso.



Vadyondzi va lava no kuma marito.



Vadyondzi va gwabisa tinhlamulo leti va ti kumeke.



Vadyondzi va phokotela mavoko no hlayela.

Dyondzo ya 1 – Peletwana rin'we

Buku leyi yi kunguhateriwile ku pfuna vadyondzi va le xikarhi ka ntlhanu na nkombo wa malembe hi vukulu. Vatswari na vadyondzisi va languteriwile ku pfuna no nyika nseketelo eka vadyondzi. Vadyondzi va nyikiwa nkarhi wo dyondza mipfumawulo na mavulelo ya yona. Leswi swi endleriwa ku pfuna vadyondzi ku dyondza ku hlaya Xitsonga. Marito yo tala ya peletwana rin'we lama tirhisiweke ya kumeka ngopfungopfu endzeni ka Bibe. Mipfumawulo leyi yi tsariwile hi maletere lamakulu na lamatsongo.

Mudyondzisi/Mupfuni

Xikongomelo xa dyondzo leyi i ku dyondzisa mipfumawulo ya switwari na switatisi. Dyondzisa vadyondzi mipfumawulo leyi u tlhela u va nyika nkarhi wo tsala marito lawo etibukwini ta vona. Vadyondzi va fanele ku sungula hi ku tsala mipfumawulo hi maletere lamatsongo, endzhaku va yi tsala hi maletere lamakulu.

Lulamisa matshamelo leswaku ya ya hi vukulu bya vona. Lava nga vatsongo no va va ha sungula va fanele ku tsala switwari leswi: a, e, i, o, u. Vadyondzi va fanele ku tsala switwari leswi hi ku vuyelela va kala va tolovela mipfumawulo leyi.

Dyondzo ya 2 – Mapeletwana mambirhi

Loko vadyondzi eswikolweni na le tikerekeni va ntlawahatiwa ku ya hi malembe ya vona, mudyondzisi u fanele ku tiyisisa leswaku va kota ku pfunana, ngopfungopfu loko va endla marito mantshwa. Loko va heta ku endla dyondzo ya n'we, leyi khumbaka peletwana rin'we, va fanele ku hundzela eka mapeletwana mambirhi na mapeletwana manharhu. Leswi swi fanele ku endliwa ku ya hi mavulelo lama faneleke ya marito ya Xitsonga. Va fanele ku khutaziwa ku tsala mipfumawulo leyo etibukwini ta vona.

Mudyondzisi/Mupfuni

Khutaza vadyondzi ku tsala swivulwa hi ku tirhisa marito lama va nga ta va va ya dyondzile. Leswi swi ta va pfuna ku tikambela loko va dyondzile no twisisa marito yalawo hakunene.

Dyondzo ya 3 – Ndzi vona

Eka dyondzo leyi Mudyondzisi u khutaza vadyondzi ku dirowa. I swa nkoka ku tshikelela leswaku a ku na xifaniso lexi nga lulama kumbe xo ka xi nga lulamangi. Hinkwaswo swifaniso i swa nkoka, hikwalaho swi fanele ku dzunisiwa no tlangeriwa kumbe ku khensiwa. Ntirho lowu va fanele ku nyikiwa wona tanihi ntirhokaya. I swa nkoka ku kombela nseketelo wa vatswari loko ku endliwa tirho lowu.

Dyondzo ya 4 – Swivumbiwa swa Xikwembu

Vadyondzi va dyondzisiwa hi swivumbiwa swa Xikwembu. Va kombete swifaniso kutani u swi yelanisa na mavito ya swona. Vadyondzi va fanele ku hlaya marito hinkwawo lama nyikiweke kutani va sungula ku ma tsala va ri karhi va tirhisa mipfumawulo leyi va yi dyondzeke: Xikombiso

mu – munhu

ti – n'weti

nts – ntsumi

Dyondzo ya 5 – Xikhongelo xa Hosi xa vana

Nyika vadyondzi nkarhi wo khongelela swilaveko swa vona.

Mudyondzisi/Mupfuni

Vadyondzi va fanele ku lava marito lama nga na Ss na Oo eka dyondzo leyi. Mudyondzisi u fanele ku va pfumelela ku titela na marito ya vona yo va na mipfumawulo yo hambanahambana.

Dyondzo ya 6 – Ngalava ya Nowa

Mudyondzisi/Mupfuni

Vadyondzi va bula hi ngalava ya Nowa (xikepe). Va pfumelele ku bula va tshunxekile. Kumbexana van'wana va vona va nga va va tshame va xi vona xikepe hi nyama, loko van'wana va nga va va xi vone ntsena eka thelevhixini kumbe eswifanisweni.

Dyondzo ya 7 – Ku herisiwa hi ndhambhi

Mudyondzisi/Mupfuni

Vadyondzi va ehleketa no kanela hi swiharhi swo hambanahambana swa le kaya na swa le nhoveni leswi va nga va ka va tshame va swi vona hi nyama kumbe eka thelevhixini kumbe eka timagazini. Va khutaze ku dirowa xiharhi xin'wana na xin'wana lexi va navelaka ku xi dirowa.

Dyondzo ya 8 – Mpfula yi xile

Vadyondzi va ta fanela ku bula no njhekanjhekisana hi ku pfuna na ku onha ka mpfula. Va kombete xifaniso xa nkwangulatilo na mihlovo ya wona yo hambanahambana. Vadyondzi va fanele ku dirowa nkwangulatilo. Va letele ku tirhisa mihlovo yo hambanahambana tanihilaha swi nga kotekaka hakona.

Dyondzo ya 9 – Ku hlayela

Mudyondzisi/Mupfuni

Hlayela vadyondzi nomboro kutani u va kombeta chati leyi kombetaka nhlayo ya swifaniso leyi ringanaka na nomboro leyi wa ha ku yi hlayaka. Vadyondzi va fanele ku twa kahle mavulelo ya tinomboro hi mudyondzisi. I swa nkoka ku kambisisa loko vadyondzi va ku encenyeta ku vula rito. Vadyondzi va nga tlhela va yelanisa mipfumawulo ya tinomboro hi ku ti vuyelela. Leswi swi ta endla leswaku vadyondzi va tiphina hi dyondzo leyi.

Dyondzo ya 10 – Muxe – Endzeni ka xibokisana xo endliwa hi tinhlanga

Vadyondzi va vulavula hi xifaniso xa n'wana exibokisaneni xoxo endliwa hi tinhlanga. Khutaza vadyondzi ku endla ntlangu mayelana na leswi va swi vonaka exifanisweni na hi vutomi bya Muxe.

Dyondzo ya 11 – Muxe a rhangela vanhu va yena

Khutaza vadyondzi ku dirowa xikandza xo tsana na xikandza xo tsaka. Tsundzuka leswaku a ku na xifaniso lexi nga saseka kumbe xo biha. Pfumelela vadyondzi ku hlamusela hi matitwelo ya vona va ntshunxekile ku ya hi leswi va swi dirowaka.

Vadyondzi va fanele ku khutaziwa ku xiyisisa swifaniso haswimbirhi kutani va ringeta ku swi hambanisa hi ku kombeta swilo leswi fanaka na leswi hambanaka. Ringeta ku endla leswaku vana va tikuma va ri karhi va tiphina hi nkarhi wa dyondzo leyi.

Dyondzo ya 12 – Milawu ya khume

Mudyondzisi/Mupfuni

Pfumelela vadyondzi ku hlaya milawu ya khume hi ku yimbelela. Va fanele ku yi ntlanguhata ku kombeta leswaku va twisisa leswi va swi phataka kumbe leswi va swi yimbelelaka. Hlawula nawu wun'wana na wun'wana u wu vula kutani u va vutisa leswaku i nawu wa vungani. Tiyisisa leswaku dyondzo leyi va tiphina hayona tanihilaha swi nga kotekaka hakona.

Dyondzo ya 13 – Davhida wa murisi

Vadyondzi va hlava xitori xa Davhida. Va lava tinyimpfu ta Davhida hi ku landzelela nkhwati wa mathonsi lowu kongomaka exivaleni. U fanele ku va pfuna ku kuma ndlela leswaku va nga banani na khumbi. Vadyondzi va ta tiphina swinene hi nghingiriko lowu.

Dyondzo ya 14 – Davhida a lwa na Goliyadi

Va hlavelele ehenhla xitori xa Davhida na Goliyadi. Va hlamula swivutiso endzhaku ko yingisela xitori lexi. Va nyike nkarhi wo ringanela leswaku va encenyeta no ntlanguhata mipfimbi kumbe tinyama na matimba ya Goliyadi.

Kambela vutivi bya vona:

Nyika vadyondzi mahungu ya vunwa mayelana na Goliyadi:

Goliyadi wo tsongahala, wo lala loyi a xiximaka swinene no va na xichavo. Goliyadi loyi a nga wanuna wa musa no rhandziwa swinene hi vanhu hinkwavo. Khutaza vadyondzi ku nyika xifaniso lexinene xa leswi Goliyadi a a ri xiswona loko va hlava mayelana na yena ebibeleni.

Ku hlela

Ku na marito yo helela eka xiphazamiso kumbe phazili. Vadyondzi va fanele ku lava no kuma marito lamo eka xiphazamiso. Leswi swi nga va teka nkarhinyana wo leha, hikwalaho u fanele ku va lehisela mbilu no va ehleketelela. Tlangela na vona mikarhi hinkwayo loko va kuma marito eka xiphazamiso.

Dyondzo ya 15 – Daniele ekheleni ra tinghala

Hlayela vadyondzi xitori xa mayelana na Daniele kutani u va vutisa swivutiso. Va fanele ku languta eswifanisweni leswaku swi ta va pfuna ku kuma tinhlamulo. Va tsala marito hinkwawo lama nga tsariwa hi mathonsi etibukwini ta vona ta misingiriko.

Dyondzo ya 16 – Yesu a velekiwa

Vadyondzi va fanele ku languta hi vukheta leswi tsariweke eswifanisweni. Va ba swirhendzevutana emaritweni lama va ma kumaka exifanisweni.

Dyondzo ya 17 – Tintlhari ta le vuxeni ti tile ni tinyiko

Vadyondzi va kanela mayelana na tinyiko leti tiseriweke Yesu hi Tintlhari ta le vuxeni:

Nsuku

Mirhi ya risuna

Mafurha ya mirha

Khutaza vadyondzi ku vutisa vatswari va vona leswaku mirhi ya risuna na mafurha ya mirha i yini.

Dyondzo ya 18 – Swifaniso swa ku velekiwa ka Yesu

Kambela vutivi bya vona:

Tirhisa chati leyi nga na swifaniso na marito. Vadyondzi va fanele ku yelanisa marito na swifaniso swo yelana na wona. U fanele ku va pfumelela ku pfunana leswaku va ta tiphina hi dyondzo leyi.

Dyondzo ya 19 – Heroda u lava ku dlaya Yesu

Tirhisa xifaniso ku pfuna vadyondzi ku teka Yesu n'wana va n'wi yisa eEgipta.

Dyondzo ya 20 – Yesu a tirha ntirho wa Xikwembu

Yesu u rhandza vanhu hinkwavo. Khutaza vadyondzi ku kanela hi mayelana na leswaku Yesu u va rhandza ku fika kwihi. Va fanele ku tsala xivulwa lexi: Yesu wa ndzi rhandza. Va fanele ku cincana tibuku ta vona kutani va kambelelana mitirho ya vona.

Dyondzo ya 21 – Yesu u hi dyondzisa ku khongela

Khutaza vadyondzi ku rhandza no khongela tanihi Davhida. Vadyondzi va fanele ku dyondza no nhloko hata kumbe ku mbiluhata xikhongelo lexi. Va dyondzise ku vula Xikhongelo xa Hosi, “Tatana wa hina loyi a nga le matilweni”.

Dyondzo ya 22 – Yesu wa hundza emisaveni

Va hlayele xitori xa mayelana na ku fa ka Yesu hi ku nonoka. Va vutise swivutiso swo fana na leswi:

1. Xana Yesu u fele kwihi?
2. Xana miri wa Yesu wa ha ri esirheni nasweswi?
3. Xana Yesu u pfukile evafini endzhaku ka masiku mangani?
4. Xana Yesu u yise ku yini ematilweni?

Vadyondzi va fanele ku dirowa xifaniso xa xihambano.

Dyondzo ya 23 – Ku yimbelela

Vutisa vadyondzi swivutiso mayelana na risimu leri:

1. Xana risimu leri ri vulavula hiyini?
2. Xana risimu leri ri hi dyondzisa yini?

Mudyondzisi/Mupfuni

- Khutaza vadyondzi ku yimbelela risimu leri va ri karhi va tirhisa mayimbelelelo ya risimu ra “Vaweti, hi welela”. Va yimbelelele risimu leri leswaku va ta twa leswi ri yimbelerisiwaka xiswona.
- Kanelani mayelana na nkoka na vusaseki bya dyondzo. Tiyisisa leswaku vadyondzi hinkwavo va kuma nkarhi wo vulavula. Tsundzuka leswaku a wu lavi tinhlamulo leti faneleke. Wo va nkanelo wa un’wana na un’wana laha vadyondzi hinkwavo va humelerisaka mavonelo ya vona erivaleni.